

इवनिंग डोगरी न्यूज़ बुलेटिन

समे .1815

खास—खास खबरें ...

<><><><><><>

## Headlines

- 1 केन्द्र च नमीं सरकार दे कल होन जा'रदे सगंध चुक्कने आले समारोह लेई तैआरियां जोरें—शोरें जारी न। गवांडी मुखें दे नेता ते हिंद महासागर खित्ते दे बी केई नेता प्रधानमंत्री मोदी हुंदे सगंध चुक्कने आले समारोह च शामिल होंगन।
- 2 डीजीपी आर.आर.स्वैन होरें आखेआ ऐ जे कनून नाफिज करने आली अजेंसिएं गी समाज—बरोधी तत्वे खलाफ सख्त कारवाई करनी पौंदी ऐ तां जे प्रदेश च रमानदारी आला म्हौल बरकरार रखेआ जाई सकै।
- 3 जम्मू कश्मीर सरकारै आतंकवादी गतिविधिएं च मुलव्वस होने दे दोशी 4 सरकारी मलाजमें गी अज्ज नौकरी शा बर्खास्त करी दित्ता ऐ।
- 4 मर्दे दे आईसीसी टी-20 विश्व कप च कल भारत दा मकाबला अपने रिवायती हरीफ पाकिस्तान कन्नै होग।

<><><><><><>

## **PM-Swearing**

केन्द्र च नमीं सरकार दे शपथ ग्रहण समारोह लेई सब्बै तैआरियां जोरें—शोरें उप्पर न। राष्ट्रपति द्रौपदी मुर्मू होरें प्रधानमंत्री नरेन्द्र मोदी होरें गी नमीं सरकार दे गठन लेई साददा दित्ता ऐ। कल संजा सवा 7 बजे राष्ट्रपति भवन च शपथ ग्रहण आयोजन कीता जाग। राष्ट्रपति होर नरेन्द्र मोदी ते उंदे मंत्री परिषद दे सदस्यें गी पद ते गोपणीयता दी सगंध चुकागंन। एहदे शा पैहले बीजेपी दे

प्रधान जे.पी.नड्डा हुंदी अगुवाई च एनडीए दे इक प्रतिनिधिमंडल नै राष्ट्रपति हुंदे कन्नै मलाटी कीती ते इक पत्र सौंपेआ, जिस च गलाया गेआ हा जे नरेन्द्र मोदी होरें गी बीजेपी संसदीय दल दा नेता चुनेआ गेआ ऐ। एनडीए दे घटक दलें दे पास्सेआ बी समर्थन पत्र राष्ट्रपति होरें गी सौंपेआ गेआ। राष्ट्रपति भवन दे बाहरै पत्रकारें कन्नै गल्ल करदे होई मोदी होरें गलाया जे एनडीए इक मजबूत, स्थिर ते विकासशील सरकार दा गठन करोग। उनें गलाया जे भारत दे लोकें एनडीए सरकार गी इक होर मौका दित्ता ऐ ते एह 18मीं लोकसभ नमीं ते युवा ऊर्जा दा सदन ऐ।

<><><><><><>

## Oath

साढे संवाददाता नै खबर दित्ती ऐ जे नरेन्द्र मोदी हुंदे लगातार त्रीह बारी प्रधानमंत्री शपथ ग्रहण समारोह च हिस्सा लैने लेई गोआंढी मुल्खें दे बक्ख-बक्ख लीडरें गी साददा दित्ता गेदा ऐ। गोआंढी मुल्खें ते हिंद महासागर क्षेत्र दे नेता समारोह च मुख्ख परौहने दे रूपै च शामिल होंगन। समारोह च हिस्सा लैने लेई बक्ख-बक्ख मुल्खें दे नेता, नमीं दिल्ली पुज्जा'रदे न। विदेश मंत्रालय नै गलाया ऐ जे श्रीलंका दे राष्ट्रपति रानिल विक्रमसिधे, मालद्वीप दे राष्ट्रपति डॉ. मोहम्मद मुइजू, सेशेल्स दे उप-राष्ट्रपति अहमद अफीफ, बंगलादेश दियां प्रधानमंत्री शेख हसीना, मॉरीशस दे प्रधानमंत्री प्रविंद कुमार जगनौथ, नेपाल दे प्रधानमंत्री पुष्पकमल दहल "पचंड" ते भूटान दे प्रधानमंत्री शेरिंग तोबगे होर समारोह च हिस्सा लेंगन। प्रधानमंत्री नरेन्द्र मोदी हुंदे लगातार त्रिये कार्यकाल दे शपथ ग्रहण समारोह च विश्व नेताएं दी मजूदगी भारत दी पड़ोसी प्रथम नीति ते सागर दृष्टिकोण गी दित्ती गेदी सर्वोच्च प्राथमिकता गी दर्शादी ऐ। दिल्ली पुलस शपथ ग्रहण समारोह दे चलदे सुरक्षा दे सख्त बंदोबस्त कीते गेदे न।

<><><><><><>

## Eve-CNC

कांग्रेस दी कार्यकारी समिति नै सब्बने दी सैहमति कन्नै इक प्रस्ताह पास कीता ऐ जेहदे च राहुल गांधी होरें गी विपक्ष दे नेता दी भूमका नभाने दा अनुरोध कीता ऐ। अज्ज कांग्रेस कार्यसमिति दी बैठक मगरा इक संवाददाता सम्मेलन गी संबोधत करदे होई कांग्रेस दे वरिष्ठ नेता के.सी.वेनुगोपाल होरें गलाया जे राहुल गांधी हुंदा नेतृत्व इक मजबूत ते सतर्क विपक्ष दा निर्माण करोग। एहदे शा पैहले कार्यसमिति दी बैठक च कांग्रेस दे प्रधान मल्लिकार्जुन खरगे होरें कांग्रेस दे नमें चुने गेदे

मिंबरें जिनें चुनां लड़ेआ ते चुनां च जित्त हासल कीती, उनें सब्बने गी ममारकबाद दित्ती। अज्ज दी बैठक च होरनें दे इलावा कांग्रेस दे वरिष्ठ नेता सोनिया गांधी, राहुल गांधी ते प्रियंका गांधी वाड़ा होर बी मजूद हे।

<><><><><><>

## DGP-JKP(byte)

जम्मू कश्मीर पुलस दे डरैक्टर जनरल आर.आर.स्वैन होरें आखेआ ऐ जे कनून नाफिज करने आली एजेंसिएं गी समाज-बरोधी तत्वे खलाफ सख्त कारवाई करनी पौंदी ऐ तां जे इस गल्लै गी जकीनी बनाया जाई सकै ते जम्मू कश्मीर च बने दे रमानदारी आले म्हौल च कोइ खलल नेई पवै। अज्ज पुलवामा च इक जनता दरबार लोआने परेंत पत्रकारें कन्नै गल्लबात च डीजीपी होरें गलाया जे प्रदेश च हाल च गै लोकसभा चुनाएं गी पूरी रमानदारी कन्नै करोआया गेआ ऐ ते पुलस दा मकसद ऐ जे इस रमानदारी आले म्हौल गी अग्गे बी इआं गै बरोबर बरकरार रखेआ जा।

<><><><><><>

## ITMS

ट्रांसपोर्ट दे असरदार प्रबंधन आला सरिस्ता आईटीएमएस औंदे सोमवार थमां जम्मू शैहर दे 44 जंकशनें उप्पर चालू होई जाग। ट्रैफिक विभाग मूजब इस सिस्टम दे राएं गड्डिडएं दी नंबर पलेट दी अपने आप पंछान करने सिंगनल उप्पर लाल बत्ती दी उल्लंघना करने आले बिजन हैलमेट दे ते तेज रफतार च गड्डी चलाने आले बिजन सीट बैल्ट ते फोन इस्तेमाल होई, गड्डी चलाने आले ते गलत थाहरें उप्पर गड्डी पार्क करने आले बारे जानकारी हासल होई सकोग। आईटीएमएस दे लागू होने मगरा सारी चाल्ली दियां गड्डियां 24 घेंटे सीसीटीवी कैमरें दी निगरानी हेठ होंगन। सब्बने लोकें गी सलाह दित्ती गई ऐ जे ओह ट्रैफिक नियमें दी उल्लंघना नेई करन।

<><><><><><>

## J&K Termination

जम्मू कश्मीर दी सरकारै राष्ट्र-बरोधी गतिविधिएं च मुलव्वस होने दे दोष च अज्ज 4 मलाजमें गी नौकरी शा बर्खास्त करी दित्ता ऐ। इंदे चा 2 जने पुलस मैहकमे च कांस्टेबल, 1 शिक्षा विभाग च

अध्यापक ते 1 जल शक्ति विभाग दा मलाजम हा। सरकारी तौर पर हासल होई दी जानकारी मूजब इनें मलाजमें दिएं गतिविधिएं पर कनून नाफिज करने आली अर्जेसिं ते खूफिया अर्जेसिं तोड़ रक्खी दी ही ते छानबीन दरान इनें मलाजमें दी शमूलियत आतंकवाद सरबंधी गतिविधिएं च पक्की होई गई जेहदे परेंत इनें दौनें गी गै नौकरी शा बर्खास्त करी दित्ता गोआ ऐ। इंदी पंछान त्राल पुलवामा दे बसनीक जम्मू कश्मीर पुलास दे कांस्टेबल अब्दुल रहमान डार ते गुलाम रसूल भट्ट दे तौरा पर कीती गई ऐ। एह दौनें जने आतंकवादिं दी मदाद लेई थेआर-असले ते गोला-बरूद गी गैर-कनूनी तरीके कन्नै इक थाहरा दूई थाहर पजाने दे दोषी पाए गे न। इंदे इलावा जेहड़े त्रीये मलाजम गी बर्खास्त कीता गोआ ऐ, ओहदी पंछान बनगाम दमहाल हांजीपोरा, कुलगाम दे रौहने आले शिक्षा विभाग दे अध्यापक शब्बीर अहमद वानी दे तौर पर सामने आई ऐ। ओह जमात-ए-इस्लाम कन्नै जुड़े दा हा ते इस गुट कन्नै हमदर्दी रखने आले लोकें दा नेटवर्क कायम करने च लग्गे दा हा। बर्खास्त कीता गेदा चौथ मलाजम वाटरगाम रफियाबाद बारामुला दा रौहने आला जल शक्ति विभाग दा असिस्टेंट लाइन मैन अनायतुल्लाह शाह पीरजादा ऐ जेहड़ा अल-बदर मुजाहिद्दीन गुट दा आवेर ग्राउंड वर्कर ऐ ते बक्ख-बक्ख चाल्ली कन्नै ओह आतंकवादिं दे एजेंडे गी अग्गे बधाह करदा हा। ध्यानजोग ऐ जे सरकारै सरकारी सेवा दा लाह चुक्का करदे राष्ट्र-बरोधी तत्वे गी बिंद बी बर्दाश्त नेई करने दी नीति अपनाई दी ऐ। दफा-370 हटने दे बाद प्रशासन नै आतंकवादी गुटें लेई कम्म करने दे दोषी पाए गेदे तकरीबन 50 मलाजमें गी नौकरी शा बर्खास्त करी दित्ते दा ऐ।

<><><><><><>

## **Terror Baramulla**

जम्मू कश्मीर पुलसै उत्तरी कश्मीर दे बारामुला जिले च आतंकवादिं दे दऊं हैंडलरें दिएं संपत्तिएं गी अटैच करी दित्ता ऐ। पुलसै मूजब एडीशनल सेशनस कोर्ट, बारामुला थमां हुक्म रसाल होने दे बाद तिलगाम बारामुला दे रौहने आले जलील अहमद राथर ते मोहम्मद अशरफ मीर दिएं संपत्तिएं गी अटैच कीता गोआ ऐ। एह दवै आतंकवादी ऐल्ले पाकिस्तान च छप्पियै बैठे दे न।

<><><><><><>

## **Samba Shoot Out(byte)**

सांबा जिले दे रीगल इलाके च जंदी रातीं अंतर्राष्ट्री बन्ने कश पेश आई दी गोलीबारी दी इक घटना च इक श्रमिक दी मौत होइ गई। आकाशवाणी दे सांबा संवाददाता सतपाल शर्मा नै

अधिकारिणं दे हवाले कन्नै खबर दित्ती ऐ जे जंदी रातीं तकरीबन 11 बजे अंतर्राष्ट्री बन्ने कश रीगल सरहदी चौकी दे नेडे इक निर्माण कंपनी आस्सेआ कम्मं पर लाए गेदे इक मजूर गी चानचक्क गोली लग्गी गई। घटना दे बाद उसी जिला अस्पताल सांबा पजाया गेआ जित्थें डाक्टरें उसी मोए दा आंदे दा घोषत करी दित्ता। ओह्दी पंछान अखनूर दे रौहने आले 28एं बरें दे वासुदेव दे तौर पर कीती गई ऐ। सांबा दे एडीसी सुरेश चन्द्र शर्मा होरें एडीशनल एसपी हुंदे कन्नै अज्ज घटना आली थाहरै दा दौरा लाया ते मारे गेदे मजूर दे परोआर कन्नै बी मलाटी कीती।

<><><><><><>

## Eye-Camp

अक्खें दा सांभ-संभाल सरबंधी जानकारी गी लोकें तगर पजाने दे मकसद कन्नै पुंछ दे सिविल समाज नै जिला प्रशासन ते एएसजी अक्खीं दे अस्पताल श्रीनगर दी सांझ-भ्याली कन्नै। मैडीसिटी पुंछ च अक्खें दी जांच दे निशुल्क कैंप दा सरिस्ता कीता। एहदा उद्देश्य मकामी लोकें गी अक्खें दी सांभ-संभाल बारे लोड्चदी जानकारी ते दुआई दी सविधा देना हा। साढे पुंछ दे संवाददाता होरें जानकारी दित्ती ऐ जे इस कैंप च पुंछ ते एहदे आले/दुआले दे इलाकें दे ज्हारा-बद्धे लोकें शिरकत कीती ते अपनी अक्खें दी जांच कराई, डाक्टरें शा सलाह लैती ते इलाज बी करोआया। इस मौके लोकें गी अक्खें दी सांभ-संभाल बारे व्यापक जानकारी दित्ती।

<><><><><><>

## Indo-Pak

आईसीसी विश्व कपक ल न्यूयार्क दे नसाऊ काउंटी अंतर्राष्ट्रीय क्रिकेट स्टेडियम च भारत ते पाकिस्तान बश्कार मैच खेड्डेआ जाग। अपने शुरूआती मैच च भारत नै आयरलैंड गी हराई दित्ता हा, जदके पाकिस्तान दी टीम गी अपने शुरूआती मैच च अमरीका दी टीम थमां हार दा सामना करना पेआ हा। तोआई अज्ज बडलै दे मैच च बंगलादेश नै श्रीलंका दी टीम गी दऊ विकटें कन्नै हराई दित्ता। पैहले बल्लेबाजी करदे होई श्रीलंका दी टीम नै 20 ओवरें च 9 विकटां मोआइयै 124 रंज बनाए। जेहदे परते च बंगलादेश दी टीम 19 ओवरें च 8 विकटें दे नुक्सान उप्पर 125 रंज बनाइयै मैच जित्ती गई। इक होर मैच च अफगानिस्तान नै न्यूजीलैंड थमां 84 रंजें कन्नै मैच जित्ती लैता ऐ।

<><><><><><>